



Die Mauer I

Ich hob ghöirt,
daß döi Mauer
an Abbau kröing soll.

A Netz wollns spanna,
fuchzg Meter houch,
damit döi Viegl
nimmer rüber und nüber könna
ohne Passierschein.

Denn dös paßt ihna scho lang net,
daß döi Viecher
ka Disziplin hobn
und si an Pfifferling kümmern
um Ostn und Westn.

Es könnt ja sei,
daß a Spootz
Sapotasch treibt
oder a Amsl
an Madla Fluchthelfer werd,
den sei Freind in Köln lebt,
wal ers drübn nimmer ausghaltn hout.

Ah der Vurschlog von an
junga Pionier
soll prüft wern:
Er mahnt, mer sollert
alli Viegl in der Zone
rout Ohmoaln,
nou wissert jeder glei,
ob a Bussard
republikflüchti woar,
wenn er vo Westn kummt,
oder obs a Spion is.